

四庫全書

集部

欽定四庫全書

集部  
康齋集卷十九

詳校官編修<sub>臣</sub>李堯棟

中書<sub>臣</sub>劉源溥覆勘

總校官知縣<sub>臣</sub>繆琪

校對官學正<sub>臣</sub>蔡必昌

謄錄監生<sub>臣</sub>桑英

欽定四庫全書

康齋集卷九

明 吳與弼 撰

序

臨川陳氏家譜序

臨川陳君正言以其高祖王田推官及祖蘭雪聘君所  
筆其先世次事蹟倣歐陽氏法為之譜命厥妹壻吳與  
弼序焉昔嘗聞諸先子談在元茶陵陳氏之學之賢及

寓甥館手澤具在益深起敬其居臨川則由玉田推官  
於撫幼子隨侍既致政阻於元鼎之沸遂家五峯賢孫  
叔恭不失其家學仲氏叔華繩武而起於是臨川之陳  
不異茶陵之陳矣嗣其世者能不思所以奮拔而可甘  
同於流俗哉

大塘胡氏族譜序

學者胡昇率其族人子璋孔明春暘鳳儀應壩等奉其  
族之譜來告曰吾始祖諱諒居成都濯錦橋二世諱讓

仕於撫因家大塘七子德信誠義居寂貴其後族繁地  
逼各卜其家於是有厚郭之派焉則寂其祖也有田東  
上郊之派焉則德其祖也蘿谿之派則義之後而鳳儀  
其脣也東陂之派則璋也其亂薪坪之派則明也賜也  
其亂昇也塤也世居大塘而同為居之派焉信誠貴嗣  
已無續昇等懼原遠而末益分或遺本初而遂亡之也  
將礮石刻三代祖於上而小註於其下奠厥大塘之舊  
址庶幾各系世得以申其追遠之誠然而未知所以孝

也幸先生有以訓予幼侍親京師且熟先君子稱誦吾里大塘文物之盛至今長老往往尚能道其槩覩遺文經故地未嘗不歛衽而徘徊也苟無請吾猶勗以振其族況二三子之懇懇乎吾聞應璩之先君子文易簣命子之辭曰某爾來前吾與爾訣雖貿爾田必教爾子以詩書博哉言乎詩書之道大矣讀而知之可以養情性尊德行可以措事業而垂無窮豈特一家一人所當服也昇也其倡而宗之為父兄者廣乃先兄之遺言毋膠

於流俗毋攪於利誘毋以貧賤而懾富貴而驕必卓乎其不撓而毅然久且裕而養羣子弟而俟其化率而宗之為子弟者奉若諸父兄之教命必正其志敏其力弘其德期底於成功吾見族之多賢矣由是慕義懷仁者聞其風而仰其族過其里而式其閭莫不咨嗟以歎曰曰幸哉胡氏之有後也豈不可謂孝也乎哉昇等拜曰敢不祇承以省厥躬以進我後人求無負先生之辱於是乎書

蘿谿胡氏族譜序

莆軒胡公嘗命其子執中族孫世衡錄其世系緘致先  
子求序既許矣未就而歿與弼間齊書帙輒覩舊題為  
之悵然以語世衡公之子鳳儀遂跪而前曰噫先志也  
先生其終惠乎予小子退而緝修之以請夫道人之善  
以示來者固君子之心而況父師之分者乎胡氏自宋  
已前世居大塘再徙蘿谿由蘿谿以來百數十載舊畬  
經訓如一日也或出或處聯芳競秀於兩宋之間者雖



譜牒闊跡而可互見於李徐二公之序亦云盛矣咸淳之際如清伯梅村小村至元以後如省堂蘿谿國初如青山倣古輩皆一時之韻出其宗而手澤存焉者其他沐過庭之餘潤以縫掖其衣者前後累累也後昆之往來於予者方進而未止焉其經史百家古今碑刻及當時交游翰墨雖荐罹兵燹存十一於千百然猶大樞小篋長箋短幅炳然而相輝也故嘗以謂談吾鄉詩書家必曰胡氏語胡氏又必歸之蘿谿嗟乎盛衰靡常惟德

是視未暇遠稽姑驗以近里之某家岡某家園聞之長老其盛時戶多者百餘少者不下五七十三五十經其地名則是事已非矣高甍百桷為他姓之室者有焉荒墟野蔓為狸鼯之藪者有焉訪其嗣不一聞也當其快意時或貴耀鄉閭或富誇阡陌挾其所有孰不欲傳其子孫以百千其世而一旦如彼何哉禮義不循而惟知利以為利故也胡氏亦嘗盛於蘿谿而子孫乃猶絃誦於其地愈久而新者豈非世有以遵夫周孔之名教而

然耶德之淑慝戚休以之豈不較然哉後之覽者亦將有激於斯歟

豐城于氏族譜序

于族舊譜既多已逸彥實氏乃旁求密訪掇拾於殘廢之餘徵諸銘刻之文復譜之以請序於予其先山東之益都人漢廷尉定國之裔曰元素字季友者宋通判吉安子孫因家南昌之豐城曰華字去非者號竹圃與晦庵朱子同時朱子嘗贈以詩有折節慕前修之句及至

房州守盡力兵間甚有功忠曰友信字盛卿者仕元為  
都昌尹以賑荒績進秩集賢提舉再遷龍興治中兼知  
路事子汝能以蔭仕廣東宣慰使都事父子俱有存筆  
率溫厚和平藹然仁慈孝友之意是代以善相承者也  
今其胤散居鄉邑及乎旁郡彥實以其尊府贅諸孫是  
居敷山於分最長聯屬其宗尊卑情文不異聚居者焉  
竹園墓在邑之興能坊為人屋之者數十年彥實累訟  
經歲未決一日奮然歎曰與其理於訟孰若白於我耶

於是齋戒沐浴十日率其族之父兄子弟躬舂鍊者積  
日而壙以暴誌以見撤諸屋凡若干楹乃敬修而封之  
以復其初人咸謂于氏譖既微而復著墓既晦而復顯  
莫不慶其先君而賢其後人予亦以驗夫福善之機為  
不爽又以嘉夫子氏中興之有兆焉蓋耳目一新之時  
正激昂蹈厲之日思昔聖賢不世之遇而有以勸於學  
思昔仕以敬其事而有以進於行思昔篤於家而所厚  
者不敢以有薄豈不愈賢矣哉而將來之慶吾知其汨

汨乎川之方至也雖然幾不可玩志無容貳彥實既分  
尊於族而協於其衆盍黽勉其往以無失諸事會也歟

豐安程氏族譜序

昔四明時原貞浦城章士言三衢徐希仁教郡庠時予  
適寓外氏往來墨池良密一時俊士若傅綱輩相與甚  
善後周譚陳萬諸公繼學事予又主於墨池者數若梁  
節輩相與不減傅綱諸人故予於郡庠非一日之雅近  
以省墓之故僑寓種湖若周觀周圻十餘士聯翩而來

程庸李章者嘗一宿於其家而承其父祖之歡庸族父  
志宏嘗述其世系一通尊公希善倣歐陽法復為之譜  
命庸以請序程氏世居洛中至駐泊公仕宋為太醫令  
高宗南渡改臨川令因家臨川之豐安市紹興中割顏  
秀惠安二鄉隸崇仁而豐安屬崇仁即今之西館市其  
後諱畿者徙侯原諱淵者徙劉仙岡諱平者徙銅山諱  
才者徙大嶺諱利者徙金谿庸之曾祖幼亨教諭徙五  
峰仍豐安居者僅二三家夫族分若此苟無法以聯之

不幾於汗漫無統而遂忘其先耶是則志宏之系希善之譜不大有功於名教哉雖然又有大者焉程自得氏以來莫盛於河南夫子所謂三代而下一人而已者子年十八九時嘗讀子朱子孟子集註至無有乎爾之章掩卷太息以為盡人也惟夫子接不傳之緒於千載之下每誦其詩讀其書想像其為人恨不生於其時又嘗適楚遥起敬於夫子所生之境而極其瞻望咨嗟之意嗟乎高山仰止誰無是心庸也講夫子之道於予矣況



為之鄉人又同姓宜何如

五峯李氏族譜序

郡庠生李章游於寓館之二載以交之厚也承乃父祖之命請題其家乘焉李氏世居吉州谷口諱讓者字遜夫登宋淳化進士第仕信州貴溪令讓生傑字孟才贅於撫之臨川幕原因以為家傑生華實實無子華徙五峯生益順靜谷口之譜亡於益益順無子靜生恕恕生原祥原祥生敏章予宿五峯而知其家庭所屬豈不以

謂世所貴於名宗著姓者代有聞人德業修而聲猷遠也然則門戶重輕不在於章乎詩云無競惟人章其似之

五峯余氏族譜序

自予居種湖郡庠生來游寓館者十數士子為題其家乘者三人余忠氏亦繼來請譜牒之書本為不忘其初而作於以傳信將來而世之作者或失其實甚至於借重他人而遂迷其所出何其惑歟然則譜牒徒為誇耀

之具哉余氏所譜雖可知五六世然皆實也且族之顯晦在人如忠者年方殷可以積學而有待惟篤其志以不懈安知余氏之族不由忠以重乎奚其偕

韓家嶺周氏族譜序

郡庠生周邦大氏曩承府主命聘予小陂已而予徙種湖裒然與其朋十數士來講學於寓館而邦大桑梓尤近故游從之好問學之功為尤篤每相與談復古矯俗等事未始不慨然增氣恒誓以詩書世其家業又思以

強其宗乃刪修其族兄民熙縣丞公所述族譜徵予言  
以為序且以為勸周氏自九一府君由郡城水西門贅  
於南鄉杜家坑杜氏杜無後而周益繁今稱韓家嶺周  
焉子獲接其族之父兄子姓而嘉邦大志於敦其本序  
而論之曰族之興在夫尚德者衆則觀感者深而尤在  
夫兆之者之厚其躬也

五峯余氏族譜序

祖者生民之所自而族者祖之支是以祖雖遠而氣脉

貫焉族雖衆而本原同焉此君子所以貴於尊祖而收  
族歟然非藉於譜則遠者有時而或忘衆者有時而或  
離譜所以追遠而統衆也不其重哉而世鮮克舉之者  
弗思耳矣蓋有祖非其祖族非其族而譜者弗思之甚  
也是故人不可以無譜為譜貴於無所苟焉耳五峯余  
生奉譜致迺父祖之命以請題予嘉是譜之善而喜生  
方勵志於問學也故樂與言之生謂誰郡庠弟子規從  
子游於種湖云

樟溪王氏家譜序

王氏世居臨川之樟溪郡庠生常徵於諸父譜其可知  
之世來以請益於予自予居種湖郡庠來游之士各修  
其譜予皆不辭而序焉然奚足輕重其譜哉常事予最  
久誠能尊其所聞以自新而不已焉必有以淑於家以  
及於其族夫譜有不重者彼徒文焉耳雖百序其何益  
吉塘張氏族譜序

正統壬戌春予攜兒子諸生抄書豫章胡先生李恪張

循亦繼諸生至既而循偕兄實侍予劍江承祖景常父  
嘉謨命禮予其家二生誠足念免輩恪重贊遂一游焉  
因以訪名山於樟木之鎮二三勝友壺觴勞中道俱至  
鎮之靈峯而止張氏少長追逐後先益懽明日復於始  
游之地倚樓賦詩而別甲子仲冬張修族譜成二生復  
以父祖命來請題噫吉塘予舊游而張氏予故人也其  
可以辭哉張之先三十六府君由撫州打鼓嶺徙居清  
江之官塘二世熙三世欣四世徹徹三子韜簡超簡三

子一子徙下塘一子徙漁塘超三子中子載徙西塘季  
子建徙吉塘建而下亡其世次今譜自可知而已昔族  
分各盛其地號五塘張氏而官塘為最韜七世洽考亭  
門人著作公尤其特然也景常祖子孫咸歎思著作之  
為人而篤循等於學夫著作之賢人當企倣況族胄乎  
然流俗滔滔志紹其世者幾則張氏不其賢矣哉嗚呼  
廓是心用宏於德曷量其至耶張氏勉乎哉烏知他日  
之吉塘不猶昔日之官塘乎又烏知諸塘不相觀而起



乎張氏勉乎哉

五峯朱氏族譜序

五峯朱生邦政邦憲師友於予久故得其族之詳五世祖諱天瑞字國祥家豐城之杭橋後於姑因姓龔氏二生謀於同門周邦大咨於其尊據祖筆宗派事實作譜以復其姓而附先正草廬吳公邵庵虞公諸賢詩文於後國祥仕元鹽運司都目其從政也所在著聲草廬稱其為有用之器焉因官而家於撫子孫克世其美二生

志皆存乎祖德者族之衍蓋未艾也予獲覩杭橋譜其  
先本孫氏而嗣於朱竊惜其並列二族而未暇斷以大  
義如南軒所記又聞此特入嗣一派耳其舊族固衆也  
國祥其入嗣之末歟抑舊族之末耶

湖莽李氏族譜序

劍江之北曰湖莽李氏世居之按說文莽文從四巾衆  
草也湖地草衆固然或改作茫失之矣李之先來自臨  
川可見之世曰勝曰訢曰孜代承於善孜次子從字伯

順生五代晉天福丁酉卒宋天聖乙丑當是時居湖莽  
蓋七八世矣伯順於兄弟敦遜讓於衆務施德寬厚人  
也三子珪琮珣琮析小塘珣析大陂琮子秉珣子襄珪  
孫冕皆以儒術登仕籍秉與司馬公范蜀公為同年冕  
於晏元獻為甥舅於蔡君謨王荊公為寮屬率際當時  
名賢以薰德而厲行自是衣冠接武族益著矣譜續於  
紹定間應龍士華再續於晦可刻梓於燾元季亡於兵  
訪得故刻於煨燼之餘訛其大陂之派與故老考補於

甲午歲者鑑也刻直圖於國朝洪武甲戌者鑑與德扶  
及進也正統丁卯旭佐景光輩命其子弟奎恪遵歐陽  
法重為譜先文之僅存者正其訛誤闕其疑以附於圖  
而續增事蹟繼焉游從之暇致諸父祖之懸示子請題  
而旭等繼至蓋孝拳乎爾祖者而恪也五七載始克遂  
迺志云

潭江潘氏家譜序

吳興潘君宏道訓導臨川郡庠訪子種湖之上而遣子

學焉再訪予小陂風雪中又聯鑣石井先隴而登金石  
之臺以其故頗及其先之緊潘氏世居烏程之潭江宏  
道尊府君祥卿洪武辛未始婚苕溪某莊而家焉既而  
潭江之族悉厄於疫祥卿且弗永年故宏道近欲追世  
譜訊先塋有不可得之歎予為賦潭江先址詩以述其  
情意謂雖無以髣髴吾先矣然即桑梓之地以顧瞻烟  
雲竹樹而徘徊焉亦足暢孝思之萬一云耳抑使後之  
人知潭江嘗為潘氏居也宏道未之愜馳書以咨鄉之

耆舊尚與聞其大較焉既不可得矣則譜其可知命使  
來告曰丐君要之一言仁矣哉君子之用心且曰不敢  
輒有附益惟傳信是尚尤得作者之體云宏道考績伊  
邇便道東歸拜潭江之涖時有新製宜飛以示我

種湖高街韓氏族譜序

韓為種湖舊姓尚矣子復居故里於韓為同社韓之彥  
曰永春愛敬於我三載如一日季父益暄猶永春也二  
公懼丘壠之或蕪以湮也率衆修治而封樹焉懼貽穆

日遠而日忘也謹祀田以勤拜掃焉懼族屬日繁而日疎也合少長以篤其倫焉復作譜以為紀載之本而屬予為序予以二公相與之厚也故不辭而為之書

高畬吳氏族譜序

吳氏由鄱陽馬鞍山徙進賢軍山湖之梭渚是為諱蟾府君三子昇燦晃昇析黃源晃析楓林燦生梅坡梅坡生九一九一生長一長一生大一大一生仲二仲二生子其季庚三由梭渚徙南昌鍾陵鄉之高畬庚三生祥

金氏曰人卷六  
鄉祥鄉生伯亨伯亨生嗣賢嗣賢娶宮氏生貞貞早失  
怙曠於學問既長恒感慨欲從師食貧養親未暇也年  
四十始游吾門同儕久益敬愛之子嘗贈以覲親之詞  
而題其柏舟之堂茲復序其族之譜云

崇溪黃氏族譜序

嚮予拜掃於紫石之坑識地主黃君克從吳君旭高今  
年秋克從以其所作族譜屬旭高將其中子亢宗來謁  
黃本姓金其先處州人當宋高宗南渡時金氏以武臣



鎮臨川居城西隅子孫因家焉莫詳何代以逃難易今  
姓孝宗隆興間有細二府君者徙崇仁顏秀鄉之棠溪  
是為棠溪黃氏克從之先大父遠山公懼忘其本初也  
克從生即名以金少長且屬譜焉其用心厚矣與其表  
姓於名孰若復其姓之為愈哉克從既繼作譜之志矣  
推命名之意以復姓惟在一斷云爾

彭原李氏族譜序

昔先子學邑庠時受詩於困學李先生繼受春秋於先

生尊府中山君子小子與弼於聞孫子儼族孫公迪皆  
辱愛焉而公迪數來講於學去年秋公迪致子儼君之  
命以其族之譜來屬序按李氏系出南唐當南唐之二  
世以大弟景達為撫州大都督封齊王居郡城曹家巷  
之慶延坊則齊王固始遷之祖而舊譜以宜春王從謙  
為第一世者誤矣譜創於六世孫翠蘿居士自是代有  
譜焉十二世孫叔權十四世孫志道十五世孫義安咸  
增修之而叔權謂舊譜往往簡畧遂推源尋派訪求悉

紀善矣志道以書官書名寓勸懲為尚史例時之序引者同聲相和以為真得史氏法夫譜牒不為尊祖敬宗收族而作徒為予奪之書耶其間固有非勸非懲而著之若法院李等抑又何歟設子孫不幸大義當絕如包孝肅公所戒之類自當不繫諸譜又奚名為乎哉義安又謂丁元季兵燹器物圖籍無寸遺偶得先譜於兵士之手遂加葺理干戈搶攘之秋拳拳譜牒而先緒賴以不墜者義安之功也其義例法歐陽氏則自子儼二君

始族雖散處而情誼相屬者世守祀田子儼君歲一舉  
祀而會族之禮行焉故也歟洽之際盍盍相勗於無忝  
爾祖哉

務東周氏家譜序

周吾母家也世居務東有文五府君者娶裴氏府君歿  
二子皆幼鞠於舅氏遂因舅姓而家於裴坊今四世矣  
周君顏仲與其從子元昂作譜以復其姓而偕周氏婿  
傳君汝恭往詢其世務東則族之耆舊皆已物故子孫

多散處於外文五府君而上莫得而考惟鄉隣尚能談  
周氏之盛皆曰樓下周焉嗚呼與弼十歲別母京師游  
又十歲歸母卒七寒暑踣地號天墓側欲絕不能今又  
四十年矣每瞻望裴坊雲物與經是山川心輒如割尚  
忍題斯譜耶尚忍題斯譜耶

裴氏族譜序

裴氏其先閩之全州人宋季以游宦流止撫之崇仁先  
譜亡逸已久近彥文君偕弟彥信君慨世系寥闊諸瑩

無所紀錄迺命與弼為之序與弼周出也周之先以幼孤鞠於舅氏裴府君與弼幼來外氏辱府君家惠愛厚故不敢以不敏辭夫裴君伯仲譜牒已謹先壠可以不忘如魏公矣若其立身立德如傳所云則尤裴君之素願而後人所當盡心也

豐城戈氏族譜序

戈氏世居臨川西鄉之七里原國朝洪武初由七里原析豐城之玉溪者諱純字祥重也宣德中祥重諸孫瑛

游子小陂於時戈氏豐裕矣瑛孟氏敏義相慈親主其  
家指甚衆而家肅雍也子間適水邊林下而瑛從焉因  
語之宜及是時以勉於學云今年夏敏義以其賢尊某  
所刻族系為譜譜成命瑛復有請焉子何言哉亦惟向  
所勉者以勉之耳然學豈直詞章誦說為哉俾稱戈氏  
族者不徒曰士人焉又曰君子焉為之子孫者不徒曰  
學為士人焉又曰學為君子焉不亦善乎苟惟措其心  
於言語文字之末而不免於猩猩鸚鵡之誚君子奚取

焉抑豈予之所望而亦夫人所當戒也

呂氏族譜序

劍池之南曰塘下有呂族焉居有先後而派各不同也  
其一曰呂王廟者唐時派也其一曰成公之弟祖儉謫  
吉州罷官寓劍池之木瓜林子世隆由木瓜林而來裔  
子傑之居館下也嘗致其尊公開先先施之辱於予乃  
六月丁丑肅將其族姓之書不遠百里冒暑謁告曰惟  
世代之念敢踵門而陳懇又曰先譜流落叔世紅巾之



變雖幸存於某氏而購未得也故祠有碑勒臨江孔氏  
之文兵燹殘闕無足徵自寺丞而上據家藏謄錄系圖  
而書自寺丞而下據家世授受而書蓋其族有德玉翁  
者元季寓鍾陵洪武中來往故里當此時年八十餘約  
其生當在元中葉前耳目所接去宋未遠凡世代遷徙  
之由經履之繁歷歷能道而國初鄉隣遺老往往知其  
世者亦多傳至於開先始紀諸冊非開先之留心不日  
遠而日微哉大矣子繼述之勤也三復之餘掩卷而歎

曰嗚呼秦漢而後繼孔孟絕學者程朱氏而已而申公父子際程成公兄弟際朱千載一時之慶重萃呂氏一門何其盛哉予小子猥以不腆之辭廁名芳籍之末又何幸歟而子孫能不興起其仰止之心而激昂其修德之志也耶

吳營橋元氏族譜序

元氏其先河南人字子哲者唐永泰中由進士令崇仁子孫世居衙後之米倉巷今則官易其地以為縣治之

公字而元氏亦家禮賢鄉之吳營橋矣邑志載縣南五步有令君遺愛碑刺史顏真卿為之書久亡令君之十五世孫宋咸淳進士凱字仲和號梅屋嘗續修其世譜既逸十八世孫璵字伯禹母黃氏讀書知史能記先系以傳自令君之二世至十二世則益盛矣十九世孫德高命諸子貴淵貴沂貴源依舊系倣歐陽氏以譜焉子幼侍親京師聞先子每樂道元氏子孫來謁必喜曰二元之後蓋二元者伯禹伯常為邵庵文靖公之高第弟

子也家藏遺墨既遭元兵復罹水患殘編斷簡寶於諸  
孫貴澄氏竊泐芳潤未始不慨然起我高山之想而伯  
常贈雪樓之子之詩註云文憲嘗序先世文集則儒術  
固盛於二元之前矣又嘗親德於德高翁藹然故家文  
獻之裔間以譜序見屬既聞命矣而貴淵金玉三人者  
躍拜庭下蓋篤其先澤之心勝而忘子之淺薄也未幾  
翁暨冢嗣先後淪喪子亦久淹於疾近貴源率諸子姓  
以譜來授則貴沂亦已逝矣感歎存歿之餘謹識而歸

之

長湖章氏族譜序

章生獻嘗示以先文而知其為尚儒之族也獻弟朴從予拜胡先生於豫章其還也朴與從兄文英迂於南浦明日識賢尊定夫於嵩山而文英尊公清夫羣從競欲賓致長湖俊夫躍馬隔溪追莫及矣今年夏文英奉諸父之命來告以其族之世曰章氏世居臨川之白城派分南樓北店譜牒燬於兵不可追其代序矣吾祖諱震

者由南樓婿豐城方岳洲之朱冒廐氏而家焉震生亨  
可亨可生原永徙南昌之長湖號桑洲白城檢校公於  
桑洲為族叔父而同為南樓派也檢校公元季平賊立  
功北店與檢校公之後無嗣已久而白城無復章氏之  
胄長湖一系僅存如綫惟負荷之弗任而無以永其家  
也謹因修譜復姓之初敢乞言焉吾聞章氏世讀書尚  
質而桑洲之規其脣曰勉為士毋淪於技又曰欽乃祖  
考篤爾同姓乃堂以隆祀而序族焉懿哉所垂之遠也

桑洲逝而法如昨可嘉矣然流俗難祛而故步易失為之網維防範者代可乏人哉此清夫章所為懼而有請也夫且所貴乎士者豈徒伊吾佔畢之謂必文行相資禮樂兼善然後無忝士之名苟華而不實豈君子所當勉哉嗚呼敦祖法崇實學章氏無疆之休其不在茲乎其不在茲乎

狹源洪氏族譜序

景泰庚午孟冬子游秋山之頭有立馬拱道側者罔而

知為洪生也後二日游其里因以訪之而識其族焉明日作朋走風雪來謝詢其世家忠宣公之裔云未幾洪生奉先子伯朋所作族譜謁告曰先世居餘干嘗結昏豐城玕溪陳氏元有陳仲益者講授洪都高祖伯仲游焉虞文靖公以女弟歸於我遂因玕溪以居而仲祖復餘干再世由玕溪析臨川之狹源先君著譜彙具即物故小子禎偕諸父作朋諸兄祥重相與撮拾遺墨就正有道願借重一詞於夫子九原為不忘矣嗚呼忠宣父



子文學節義稱天下所謂曠百世而相感者歟接胤嗣  
披珠玉能不勃如斂容哉雖然譜輕重係乎人人賢否  
徵諸德勗哉爾父兄子姓悉其心以象賢焉俾他日臨  
川之譜與餘子相交映而俱重則足慰作者心而奚假  
於予言

周氏族譜序

周君子璫偕其族人公輔隱南及外氏子黃子良三人  
者以隱南尊公所修收族之譜相與刪訂而重修之以

請序於子周氏世居邑南之文家橋靜軒處士徙桑溪  
周君靜軒之六世孫而公輔為七世孫隱南今徙沙堤  
云嗚呼世之於譜率多浮詞溢美以相高甚矣好誇之  
敝也夫惟榮落之士振其宗於德義詩書之懿以不怠  
焉為足以顯其親於無窮而著其譜於不朽奚事乎馳  
其心於外哉周君其有感於斯歟族人子姓抑知勉矣  
夫

鄉塘周氏族譜序

豐城周順問從游山間步月溪上因以及其家世焉其  
先臨川之戰平里人今居豐城縣西之鄉塘鄉塘之先  
由山塘而來舊譜火於洪武間不可知其遷徙之由矣  
僅存一圖於族人伯敬贅居之澳源按圖重為譜者伯  
張大猷也因是譜而加邃密焉者尊公士肅仲父士倫  
也回祿災餘前蹟寥闊近代以來尚義而嗜學者累累  
有之而胡烈婦事尤壯偉皆著之譜矣傳謂先祖有善  
而弗知不明知而弗傳不仁嗚呼知而傳者固善擴充

之以世其美者不尤善乎順也其倡而宗以力於世其美哉

西解彭氏族譜序

五峯之西西解之濱有彭氏焉其先都昌人不詳何時徙五峯字從善者樂施人也為橋凡八十由五峯之支出徙今地舊有譜流落田西魯氏久近彭君九璋命其子回從子俊咨於族人九經九鼎合族之長幼卑尊僉謀請於魯既逸矣輒次第其可見之世勒諸石且屋之

為族譜之序以展禮焉族之興也勃然矣嗚呼孰謂升降之幾而不繫於人哉予嘉彭君輩之銳於首義而族之樂於隨也於是乎言

興國汪氏族譜序

興國汪氏鴻潛二子之學於予也其州牧樊侯不知予之無似徒以虛聲誤其辱鴻父兄宗族由侯故益激其尚德之心焉而侯之與汪多矣鴻歸之九年潛復領其合族之歡心以諸兄從魁等所著世譜請於不德之文

汪氏世居興國之牌港仲敬府君由牌港徙樂平里之  
同步牌港之東有祖墓曰蔣三府君子孫世祭掃之豈  
興國始遷之祖與譜亡於兵無所徵必欲為之傳會是  
誣也今譜自可見之世而闕其疑得之矣潛之來鴻以  
親喪沮潛與吾兒讀春秋凡兩月而歸家慶禮畢為我  
謝諸父兄而語諸鴻樊侯獎勵之重得不服膺書紳勉  
為令族以光爾祖而答賢侯耶事會難逢而時無再至  
其念之哉侯名繼金陵人去官久而民益思之云

同安李氏家譜序

李氏諱露奮者由鄱陽界田丞同安之同城子孫因家  
懷寧望城岡之檀沖中徙同安城北之南莊嶺永樂丙  
申予省覲太學次同安傳舍聞孫思誠招致南莊之上  
以教其二子性之宜之而季子尚在孩提也後三十有  
七年重訪舊游則思誠與冢嗣久物故宜之與季崇之  
克隆先訓博交當世縉紳以充其才性而以詩書華其  
戶庭褒然為同安著姓可嘉也適成其族氏之編而請

文焉子感夫逝者之不可作而重其後之有徵足為李氏慶也於是乎書

述溪方氏族譜序

方氏其先安陸人鎮國君文仕元為江西福建等處征蠻統制都元帥兼招討使封鎮國公子明威將軍仕撫州萬戶府總管授世襲五世總管君伏節大明洪武初子孫家臨川之述溪與崇仁之郭墟予種湖故址於述溪桑梓連故得與方生文照游且嘗屬其世德不可以



無述也既而生以書經領薦教同安景泰癸酉七月壬午訪予同安城北南莊李氏之寓欣然以族氏書成告夫事患後時幾貴早斷世澤將斬之餘紀載少稽不逾遠莫究而遂忘其先耶懇乎生之用心也廓是心以念鎮國明威著功於其始而慨總管以節善其終追逸駕而貽嘉謀家法當如是矣

同安黃氏家譜序

予寓桐城何家圩嘗見禮於黃氏翠屏翁與仲子永常

為論其世系之記述而知其族孫金之有志於斯也已而會金於秣陵歟洽連日夜乃記憶尊公菊憲所授次第之以請且曰十五載之心事云黃氏其先由鄱陽徙桐城之鹿兎城譜以兵燹而亡原仲府君國朝初徙近地之蔡家坂今同高曾之親聚處一地指逾三千食祿者日重而業儒者日多夫先積之徵如此而金也復倡其宗益隆於善方來之慶可量哉金為禮闈乙榜進士復會多士就試神京蓋將推其家族以達於邦宜愈自

克矣

同安丘氏族譜序

予以尋醫問藥之故息肩桐城何家圩丘氏之里國子  
上舍生丘士安承其尊公志原之命賓致鯉庭以家譜  
請為序丘氏世居同安小南門同安坊元季之變志原  
大父濟民挈家逃難流寓同城考君仲華贅於邑南何  
家圩周氏因以為家志原君躬勤瘁以立其門戶豐裕  
奚遣子學邑庠既升胄監仍隆師別墅以淑諸孫年過

八十而篤勵之志不少懈古人云廣積不如教子丘氏有焉子孫其勿替引之哉

上饒婁氏家譜序

昔上饒周文婁諒承其父兄之命來游小陂未幾諒得疾歸行祖之贈有麗澤何時重起子之句後五年子自金陵經貴郡暫留賓館接諸父兄子姓而觀厥世譜焉婁氏其先信陽人元季有韓子福者與其鄉人逃難南奔因家信城之盈濟坊在信陽故大家今上饒為著姓

撫卷之餘病惟歸志起予之云徒成虛語豈惟生有不  
豫而予亦焉能恕然哉雖然學之方凡目視耳聽口誦  
心惟善者從而否者改皆足以發吾聰明而崇吾德業  
此古人所以貴於能自得師也況生也觀光禮闈俊游  
日富樗散如予雖日同堂而共席奚能以資麗澤之萬  
一哉廁名芳籍愈以自歎耳

上饒周氏族譜序

周氏世居上饒古梁之周村譜亡於兵昭穆世次與其

遺蹟子孫皆不能追憶矣惟傳聞家有堂名天恩御為  
記亦不存焉近茂傑審理公嘗命族子文譜其可見之  
世正統戊辰文與其友婁諒游館下以語子後五年子  
自金陵經貴郡青燈話舊婁氏之堂昔者之來跋涉晨  
昏忘其飢渴蓋當是時惟懿德是尚而不知疎薄之無  
足與徒虛譽是信而不知實德則病是以誤生之辱也  
雖然子履輟宜戒而生夙志不可以不篤世德不可以  
不求堅金蘭之誼增華譜之重顧自力何如耳

黃氏族譜序

金谿黃衍黃衍氏一而族殊也近各著其世系以爲之譜皆莫詳其所自來相承衍之先由南豐雙井徙臨川之厂下由厂下徙金谿之嵩湖衍之先由崇仁古塘徙金谿之程坊程坊與嵩湖桑梓連而衍衍締交密故誼同兄弟焉然平仲世希而善終者難是以歲寒然後知松柏也豈惟交哉先正謂今之學者如登山麓方其迤邐莫不闊步及到峻處便逡巡苟能遇難而益堅何遠

弗至也二生並學吾門有年矣慎斯言也以往輝黃氏之宗而生邑里之光也何有交云乎哉

五峯黎氏家譜序

嘗與故人黃季恒論五峯舊族因及其子婿黎淳家世淳亦間語焉黎氏浙人也再世仕臨川子孫遂家五峯三世諱益葬南鄉孟婆峯號尚書墳四世號月樓讀書尚書墳所葬十八里鋪號學士墳皆莫究其履歷之實月樓當宋末罷官復於尚書墳所構日新書院以教授



元累徵不起號南隱所居後名黎家坑五世諱謙六世  
諱友直中元鄉貢進士赴春官道卒七世字伯中是為  
淳魯祖故有譜近燬於其族人之手淳所譜特舊藏神  
位及粗聞家世所傳耳其詳不可得而考矣惜哉使譜  
修於伯中時先譜固無恙而記憶為猶近今去伯中三  
十年矣更三二十年代序異而人事殊欲為之譜者不  
尤難乎淳也其於是舉良足嘉哉是為序

舉林車氏族譜序

車氏莫詳其所始世居臨川長寧鄉之稠源五府君者徙金谿歸德鄉之舉林譜倡於十世孫用烈而贊襄於用正用彰用徹也五峯李公迪賓其西塾久子知車氏由公迪焉近進用烈嗣子泰業館下復為請大書其堂曰尚義樓曰讀書既而子歸自金陵經車氏與公迪論文尚義之堂而顧瞻讀書之樓以歎曰車曰大而舉林其曰重乎蓋義者天爵之貴書乃聖言所在雍容是堂登降是樓者能不奮思以有作哉姓隨事顯地以人勝

用昭師友之誼而壯厥孫謀族氏之光孰大焉因譜乞  
言序以勗之

金谿南山傅氏族譜序

金谿未縣時為臨川之上幕鎮傅氏其先有伯仲曰行  
廂行唐者由上幕之五岡析永奉鄉之硤口莊行唐居  
城上行廂居東岸東岸尋更名曰鱣行廂生師璵師璵  
師璵徙西山師璵季子曰某徙掩坑掩坑之四世曰商  
佐徙鶴溪鶴溪之六世曰公世徙南山師璵白鱣之五

世曰安潛宋建炎初募民應詔為社兵累功荐進秩授  
世襲勅云父子兄弟將權世世之相傳族黨比閭軍士  
人人之素習蓋西山之後曰安道及商佐安潛子根皆  
協力濟功者白鰭之九世曰子雲鶴溪之五世曰陸俱  
事陸文安公南山之四世曰景賢從陸氏之後俊游文  
丞相開府江西辟玉山令以率義兵五世曰德華漱陸  
餘潤於外氏即陸廢基建學舍堂以事三陸贖義莊以  
養士六世曰壽師草廬吳文正仕元中書省檢校使閩

浙革命後歸休田里十二世曰芳因內兄車泰業館下  
既而奉父祖命復屬泰以請序其族之譜譜始於祐續  
於籌雅晟其易歐氏法則自今日焉予嘗客歸自浙經  
芳里假宿連洋是為諸陸之鄉詢其遺蹤與其苗裔瞻  
盼其山川雲物而遲遲吾行者非以夫人之賢哉誠厥  
心以希賢焉安知曠百世而相感者不猶今之視昔也  
耶有懷往躅用策芳云

荆溪呂氏族譜序

寶塘之北汝水之西曰荆溪呂氏世居之厥初蓋由浮梁而來也其隣生吳魯氏致尊公子通之命告子以呂氏邦翰公翰兄弟者既納粟受旌矣而日駸駸於義事焉乃咨於其族之長本誠從父中良僉謀於族之長幼卑尊構奉先之堂修收族之譜屬里生陳達以譜請序嗚呼是舉也不其重矣乎程子之不忘本魏公之孝之大真知言哉然流俗滔滔知而信者恒少因呂請著之以詒來者云

西汀鄧氏家譜序

鄧氏其先由建昌而來也世居崇仁惠安鄉之西汀子  
嘗游止其地者數接其祖父子孫四世驩如也前之開  
業者事乎先子後之繩武者辱於不肖焉東平吳生世  
光近來小陂雪窓話舊嘉鄧氏既有田以供其祀復為  
譜以謹其世予時契闊西汀一十載矣聞善相喜嗟歎  
久之創譜者廣淵徵子言者騏與長而贊襄者吳生也  
譜無夸事文略浮辭貴傳信焉耳

唐山戴氏族譜序

景泰丙子唐山戴君子穎倡義作祀先之堂天順戊寅春仲氏子顯偕其族孫亨慶正同修其世譜來屬題系出唐刺史叔倫幼子芮舊圖世次有疑今斷以南唐始遷之祖諱英字邦彥墓本里之百畝阡者為第一世子以王程星火未暇詳覽耳目所接則元有字元叔號元齋者富而重儒六子皆承家學字懋純號山雪者為第五洪武初教諭邑庠先子所事也字仲本號務本者為



諸孫訓導西齋經業尤邃山雪冢嗣仲暘君豪烈尚義  
子會君者為元齋魯孫敦厚莊重邑士侯孟恒稱為鄉  
里人物之冠數君子者前後輝映而唐山之名四馳增  
重鄉邑矣子穎君居族之長而長幼服其德子顥君建  
讀書之閣而子孫無敢慢堂之成通族之力譜之修二  
三子之志云

荆溪華氏族譜序

華氏少一府君者由南豐徙居崇仁惠安鄉之荆溪至

五世曰顯宗者析本里之清塘昔友人黃季恒嘗從予  
省墓紫石坑經荆溪指華氏伯良之居曰是蓋素仰先  
生者盍一訪諸子辭未遑也後十載重經焉質諸其隣  
友吳子通氏而黃君之言為信時黃君物故久而平時  
誤嚮往予者率晨星矣惟伯良年過七十而迎候康強  
適華庭新構境物春明暄妍之至童稚咸欣而嗣子廣  
告子以疇昔之夜實夢夫子染翰於斯宛然今日也予  
既答以紀夢之詩而伯良相好無已也復偕其族人正

倫屬門人王忠彭回來請序其族氏之書云

孫坊孫氏族譜序

天順戊寅春子將有北京之行遍省先塋經孫坊孫紹  
先氏得暫叙世好既而紹先以其世譜請子不腆之文  
蓋令祖清所翁先友也先子寄詩有藕花溪畔竹林幽  
步屨西風記昔游之句子兒時拜儀表於先子官舍翁  
既歸鄉辱為忘年之交鄙詞致莫有云抱衾裯以共宿  
語達旦而不寐又云當春暮之趨庭辱縞紵之深意且

祖妣寔惟孫氏為志廣之親派而與恭者念子尤厚夫  
既叨友朋之誼重以親戚之好安敢吝於紹先之勤哉  
孫氏派析豐城奠居種坊後裔蕃衍著孫坊之名焉世  
有祀田族歲一合僉欲作祠而未遂也祠成他日歸田  
又當為之記云

種湖章氏家譜序

章氏祥四府君由五峯壻南鄉之官員嶺中二府君由  
官員嶺壻種湖因以為家季子軫以去族日遠迺考譜

於五峯故里藹然孝敬之心惜遺老凋謝無所於咨僅  
詳曾祖而止然能不謬所從以免崇韜之誕又以見軫  
之賢也謂予有里閭之好師友之誼請為序焉

### 胡氏族譜序

友人胡子貞持其族譜一通見示且曰昔國初宗老子  
為公之修譜也一以祖宗視之而收其族不以族之貧  
富異其心故吾一派獨以貧而見系於全譜者公之力  
也予聞而嘉子為公之仁族子貞之知感皆非淺之為

丈夫者矣為子貞者其率夫同派之親漸摩乎禮樂涵  
泳乎詩書日新又新上可追前代聲華之美下可貽子  
孫無窮之謀又何貧富之足論哉若夫齊家之要睦族  
之方具有聖賢成法可攷而知褒然而倡在子貞固宜  
勉翕然而和又衆人所當踴躍也

豐城胡氏族譜序

豐城胡清雖未識而問遺嘗相及情固通也清卒之五  
年弟源以其族譜來請序胡氏世居成都濯錦橋諱諒

者與韓昌黎同年進士仕汀州守長子讓仕撫州幕屬  
因家臨川之大塘撫州之孫可朋由大塘徙豐城厚郭  
之富塘富塘之十四世曉峯居士徙銅湖曉峯子庭瑞  
徙漢港庭瑞孫宗玉徙邑南是為清祖也清近以市之  
隘也卜宅同造而源仍在邑家世遷徙不常易迷所自  
為兄弟憂故著譜謹本支而未暇旁及勢然也譜成其  
族人九韶友人于彥實與有力焉

長山晏氏族譜序

昔者長山晏海氏謁于小陂從游近地之覆船岡大同  
峽詠歸甚歡也繼學於種湖率弟漳與其羣從淵源連  
厥外姻纍纍而來海方悉其力於蚤夜而得病歸矣予  
寄詩有頡頏多少金蘭友日日賢關遲早來之句海竟  
抱伯道之悲以謝於世不相聞問者十載消溟紹其家  
學於小陂之三年漳復攜其子彥相與切磋之而涇亦  
繼至豈獨慰予之思抑以快九泉之志焉既而漳等奉  
諸父宗衡宗敬之命以所修族譜請序又悔平生所願



而未遂者固子所樂道也晏氏其世次顯晦遷徙不常  
諱壩者唐咸通中舉進士卒官江西始著籍高安壩生  
延昌自高安徙臨川長樂鄉之沙河延昌生邵邵生旦  
固諫清亮聰貞漸固生殊是為元獻公旦以子貴累贈  
少保濟南郡公旦生洵以兄殊薦主洪州豐城簿累官  
至某官贈光祿大夫開國侯劉沆雅所推重洵生奕蔭  
授大理評事徙長山奕生承承生紹休知道州江化縣  
紹休生光元免各以經學顯號稱三晏元常州司法嘗

尉淮陰治劇有聲元生澈秘書校勘澈生綬績績字伯  
庸嘗續修其世譜黃義剛善之綬生執中執中生慧老  
慧老生安民安民生霆霆生夢洙夢洙生天祐天祐生  
繼殊繼殊生璉琦琰璿璣自洵以下雖粗見歷官而事  
功多無所稽通其旁支可知大歸者穎洵輩凡十餘人  
嗚呼晏氏可謂多才矣任繼序之重者能無高山景行  
之心哉

樂安草堂易氏族譜序

天順戊寅春將有北京之行樂安易生祐為使永豐還  
且別矣復留止馬語及先世遷徙之由既而與其族兄  
純以譜見屬蓋諱東者兄弟三人自建昌南昌竹由市  
而來宋靖康乙巳東主崇仁簿子孫家天授鄉齊城里  
之杭橋字仲謀者家齊城里之草堂今屬崇仁字仲喬  
者家臨川惠安鄉之西館今屬崇仁仲謀生煥臣煥臣  
生光明光明生文貴文貴生處仁處仁生仕勝仕勝生  
以仁為純祐之曾祖代以耕學相承嗚呼子素慕樂安

山水之秀而未獲游荷邑彥之過知於我而多未識因  
易譜而廁不腆之文豈不大污於名山勝水而重辱我  
知已也哉

槁溪饒氏家譜序

晉子復居種湖時隣翁饒志堅氏遣諸孫燧來學燧乃  
予所命之名而字之曰子光也天順戊寅正月辛未燧  
偕其同里生魯正范拱衡雪小陂問訊京師之行而正  
也告子以一承諸父兄之意屬序其家之譜饒氏其先

由南豐社背徙臨川南鄉之種湖素以淳謹稱於鄉而  
燬者予蓋假名與字勗以輝華其身於其家於其族而  
不知燬之用心為何如也日月逝邁感念今昔悵然書  
以復之

餘姚楊氏族譜序

餘姚楊侯文琳叅政江西之三年奉勅以軍務臨敝郡  
束書遣使命僕曰吾先河南汴州人諱僖府君者宋高  
宗時扈從南渡遂家越之餘姚世系荐罹兵燹乃者譜

自六世祖辛三府君而下生娶卒葬行諱官歷粗具願  
序于君焉豈惟感存歿於一門且賴永光斯譜矣噫此  
楊侯之謙德知我之過誤也昔楊侯初遷秩畫省時適  
僕叨聘寓金臺興道致治之誠溢於承顏接辭之頃尋  
徵輿論夙著蘭臺夫以瀟灑出塵之資蘊瑰瑋奮拔之  
志篤茲以往名門華譜安得不益大而益重矧族之後  
人觀感而興起者固不可量瑣瑣贅說徒為贅焉耳

豐城曲江熊氏族譜序

豐城之北曲江之濱有熊氏焉曰松澗先生字子超者  
為第一世松澗而上及松澗而下其遷徙之由與夫官  
歷隱德之跡代遭兵燹無可徵矣惟世傳一系於十七  
世孫豫章之家亦不免於殘闕焉十六世孫崇壽嘗以  
所聞見生娶卒葬述諸簡牘十七世孫婉因系與述倣  
歐陽氏圖而譜之貴麓從弟用端樂於鉅梓婉承親命  
屬所知張循戴祿徵予文予以病辭婉懇請之必欲得  
而後已先正云人之所以與天地日月相為長久者元

不在此則文之有無何關得喪矧不佞如子者奚文之足云嗚呼流俗滔滔知德者鮮安得起雲谷於九泉以咨所謂長久者哉

上饒祝氏族譜序

祝氏世居上饒其鄉靈峯佐溪之鳳凰墩故儒家諱高字維東者贅某鄉渭川姜啓詵氏遂冒其姓啓詵年老無子維東力勸圖後啓詵固辭且曰暮境尚冀息耶維東扳諸姻戚固以請遂得妾生子維東屬纊之日顧諸



子鼎新付新等曰姜氏似續幸有人矣爾其復吾姓修  
家乘丐文作者季子永新近以諸兄命從其鄉先生婁  
克貞謁予小坡致先子之屬文詞非予所長縱強為之  
空言何補然則其學道乎道凝厥躬是謂有德道德之  
懿為世禎祥以顯父母貽孫謀君子能事孰大於此詩  
曰無競維人祝生勉乎哉

送按察使原侯序

江西提刑按察使陽城原侯初由正統乙丑進士歷浙

江廣西二道監察御史嘗巡按江西及審刑撫安北直  
隸諸州遷今官三載矣報政伊邇霜臺諸賢最乃績曰  
所在著廉能之譽以僉憲同安程侯嘗辱於崇仁吳與  
弼也授之簡而命以丈夫廉者德之符能者才之施德  
一而才二才施於所宜施也其在已為吉人端士其示  
人如青天白日人之仰之如景星慶雲其及物如和風  
甘雨焉然學有純疵志分淑慝從古以來負聰明卓犖  
之資而枉其才者多矣若吾原侯者善於用其才也歟

揚休光動羣寮豈偶然而已哉抑聞儒者逢時生靈之  
慶聖明在上正豪俊有為之秋功高社稷名重丘山又  
僕之私於吾原侯者焉

送進賢邑宰呂廷和序

竊嘗論邑宰之美必以武城單父晉城為巨擘焉一則  
絃歌播聞一則不下堂而治一則學者風靡三邑生靈  
何幸際於斯日也有民社之責者聞風能無興起桐廬  
呂侯廷和之宰進賢也名其退食之所曰正心治之左

曰善教右曰善政社學曰涵養良心非志於希賢者乎  
三載考績將赴天官願攀轅者衆口一辭亦可以見秉  
彛之在人心固無古今之異矣職其邑之教者蔡貴沈  
經涂璣三君子具書命使請言以為贈夫言宓二子親  
炙聖人之化程伯子亦學聖人之學者學固當以聖人  
為依歸去聖雖遠微言尚存玩其言以得其心何遠之  
不可到哉日知其所無月無忘其所能吾於呂侯是屬

臨川岡上李氏族譜序

鄉者子以家難滯五峯諸生車泰車亨輩相與周旋僑  
寓旬時李希者由泰而來也且欲以成其族氏之書而  
請文為序以慰通族尊祖敬宗之心屬者四三子講學  
小陂復申前懇李氏其先由南豐雙井遷臨川積善鄉  
之嘉村五世諱發由嘉村遷湖東七世諱安祥諱桀諱  
立極遷近地之岡上諱祀諱榮仍湖東代為淳謹之族  
夫謹家牒而不忘乎先塋固孝之大而立身揚名尤先  
務之急豈惟族黨之光抑一方風俗所繫古語云富貴

易得名節難保可不念哉

臨川鳳棲原周氏族譜序

周氏其先世居建康句容之鄔家巷號梅窻者徙南康蓮花峯下梅窻生定式宦游建昌之南豐因家焉定式生純仁贅五峯黃知軍氏遂家郡城之仁孝坊純仁生文明仕元兩淛鹽運司提舉文明生立禮鹽運司丞立禮生彥海達海達海主饒之樂平簿嘗修其世譜虞文靖公為之序七子曰伯莊者生仲謙贅密前胡氏曰伯

宗者主南昌進賢簿生仲彬由五峯贅鳳樓原許伯高  
氏遂家於樓前四子叔炯叔煥叔燦叔熺予往盱江兩  
經其地皆假宿叔煥叔熺氏伯仲不知予之無似而過  
於崇重焉留周之詩有但得主人能好客幾時無事又  
重來之句許詹二生嘗從宿者偶論疇昔則伯氏久物  
故而家庭之誤愛我者猶昨也未幾叔炯嗣子麟咨於  
季父叔熺偕從弟茂輝介詹生來請題其續修之譜噫  
予老且衰兼北京之行在邇重來既不可擬而離別之

思方殷惟周氏充誤愛不德之心以益培其所秉之彞  
則豈直光周氏之族抑以快予之私云天順戊寅閏貳  
月辛巳同郡康齋吳與弼書於小陂東窻時宿雨初霽  
韶華滿目佳興與人同也外孫寧壽給紙墨雖秃筆無  
鋒刃然情思則暢云

康齋集卷九



欽定四庫全書

康齋集卷十

明 吳與弼 撰

記

厲志齋記

事必有志而後可成志必加厲而後不急蓋志乃心所向而厲則自強之謂也農之於耕工之於藝商之於貨莫不皆然況士之為學乎世之志於學者孳孳早暮不

可謂不勤也其所求言語文字之工功名利達之效而已志雖益勤學雖益博竟何補於身心哉是則非聖賢志學之旨矣聖賢教人必先格物致知以明其心誠意正心以修其身修身以及家而國而天下不難矣故君子之心必兢兢於日用常行之間何者為天理而當存何者為人欲而當去涵泳乎聖賢之言體察乎聖賢之行優柔厭飫日就月將毋期其近效毋欲其速成由是以希賢而希聖抑豈殊途也予年弱冠賦厲志詩曰夙

興夜寐孳孳惟義矢有成人毋安暴棄當是時於聖賢  
為學之方頗得其萬一而自謂古人有不難到者不意  
多病侵陵與事乖迕而志益荒碌碌於衆人之中倏然  
十更寒暑此心一靈或興感於中夜成發憤於窮途日  
時既往悼道無成昔者之志回視如夢其悲歎之極蓋  
無復有意生於世也此無他志不加厲之過也友人傅  
秉彝名其子嗣裘讀書之齋曰厲志予一日訪其齋命  
嗣裘請益予感其齋名同予詩也因告以自得之由與

自棄之實而勉其不可不造厥極焉秉彛善予言且請  
記諸壁云

松濤軒記

丙午

臨川之屬境曰清溪山谷深邃泉石幽突於焉卜築者  
邑人胡伯恭也伯恭逍遙徜徉士田園足以供朝夕子  
弟足以服勤勞繞徑多松母慮百株厥土肥沃而松益  
茂時天風驟興則奇聲異吹蕭颯林莽震蕩宇宙恍焉  
如黃河沸如碧海騰鏗乎咸韶奏鏘乎笙簧鳴揚揚游

游而莫測焉聽之餘萬慮都消精神頓爽爰葺崇軒暢  
茲清致良辰美夕輒冥集明好而共其勝契軒中之趣  
者未嘗不心醉而忘疲起坐久而不知歸也軒未名或  
請於伯恭伯恭狀其似而命之曰松濤屬予之以記之  
予觀人心之感因物以宣感而正焉斯其美矣夫草木  
之鳴非不多惟松也不粗不厲不噍不悲是物之善鳴  
得聲之清者伯恭樂焉不亦宜乎雖然樂物者不徒耽  
其趣必有益於已也故淵明樂菊隱節以厲漁溪蓮樂

君子是勗今伯恭於松濤尚思其清以潔乎心心潔而百行從可正百行正則人道備矣伯恭勉乎哉子於伯恭有同郡之好而高伯恭之所尚也於是乎言

世美堂記

武毅將軍伯崇寓書於予曰先子暨崇皆不幸早孤賴祖母汪恭承先緒以至於今日奉養有堂願吾子名之且申其說以教我焉惟太夫人遐齡八旬而嬪居者五十載峻節凜然如一日柏舟之志亦何以加予小子廁

姻門之末尚仰餘光況子孫哉宜崇有以請也伯氏自  
元以來代樹武功詩書兼茂而太夫人繼以孤風遠操  
輝映後先奚啻景星慶雲之為祥麒麟鸞鳳之為瑞所  
以表著伯門非左氏所謂世濟其美者乎予撮左氏之  
詞大書以復之而勉崇以修厥德敬乃負荷俾君子咸  
曰伯氏有子則所以孝太夫人者旨甘之奉云乎哉予  
逮事先曾大父耆德之典刑先尊讀書太學忝侍筆硯  
之側太夫人養疾京師與給湯藥之役暮年多故江湖

阻深無以寓其契濶之思遠書珍重何喜如之他日泊舟江浦拜慶稱觴於世美之堂又當為君賦焉

唐山書閣記

昔伏羲肇畫於龍馬之圖而文籍生列聖繼作紀載漸繁皆所以出治道立民極焉後世風氣日殊諸子百家雜出而塞聖途害人心者非一此文籍之弊世道之不幸也任道者每憂之所以正人心息邪說距詖行放淫辭者無所不用其極而後列聖之緒賴以不墜然自古



有志者少無志者多知而信者恒寡能不為他岐所惑而卓然自立於斯道者尤難其人嗚呼世患不讀書讀書者又患不能以正而入於邪夫惟善學者必本之聖人之教居敬窮理以修其身真積力久然後知彼一切世俗之學舉不足為而吾所以參天地贊化育者其道弘矣唐山戴君子顥為閣於堂西子弟藏修其上而咨讀書之方於予吳與戴世有通家之好而先君嘗事子顥大父於邑庠諸子姓又皆辱從游其可無辭以對戴

金匱要略卷之二十一  
君不予謬遂書以為唐山書閣記云

饒氏世系堂記

昔臨川饒迪功叔暘受春秋於朱子門人張主一氏遂  
世業焉彭原李中山氏壻於饒得是經以授先子而饒  
於吾外氏五峯陳為世契於不肖子為新好是以饒君  
景德命其中子烈長孫嶽之來學也予不敢以常師弟  
子例視而烈情誼日洽告予以其尊公將刻所續世系  
於石作堂於故址後巔而奠焉於以致孝敬而合族屬

顧先生有以發之予觀梅邊公之序譜也從論旴撫諸  
饒同出五代太守亮而旴有亮墓焉知未有亮墓時旴  
撫豈皆無饒氏邪又謂從兄楚林嘗之旴南象岬饒氏  
其老人語以塘坑迺其分派錄譜歸而尋燬譜既無徵  
老人語未必可據為信且不聞始派之祖為誰事寥濶  
亦無足云云也惟曰邇而上可知者十一世而開蹟塘  
坑者不可知是為的論又云族盛於建炎中微逮祖伯  
仲藏書萬卷譜云伯諱釜年十二中神童科仲諱鑒即

叔賜年七歲亦中神童科時號大小神童後之人粗知先緒者梅邊作譜之功也小神童公之曾孫熙壽俱事草廬吳文正公之門見草廬邵庵序記及伯宗吳公之誌雪崖所續之譜而熙教韶陽時刻草廬所勉首尾吟於學之座右以敬勤師命云夫主一炙朱子性命之教而草廬亦聞朱氏而興者饒氏奕世師承若此孝子慈孫拜斯堂念厥祖寧不勃然以起邪殆必有以躡吳而企朱以侈塘坑之故事而感此心之同然於將來者不

愈深乎哉

麟經軒記

昔孔子感麟而作春秋故後世目為麟經焉臨川饒迪  
功叔暘氏受是經於紫陽夫子高第弟子主一張公遂  
世業之迪功之八世孫烈游吾門之三載懼先緒之或  
荒也乃偕從子嶽日與吾兒復討論焉予嘉乃志為題  
其几硯之處曰麟經之軒先儒之說是經者有曰經世  
之大法又曰窮理之要有曰非理明義精殆未可學又

曰必優游涵泳默識心通然後能造其微嗚呼方策徒存師友非古安得神交心契聖人於千載之上以免於畫筆擬化工哉雖然豪傑之士固不以古今之異而貳其心也刊落浮華一味道真俛焉日以孜孜惡知其不循至於洒然之域邪噫甚矣予之無似而景則桑榆矣記此雖以勗烈而勵吾子抑以自訟云

雙松堂記

彭回者吾姨氏子也其奉親之處有二松並秀簷樞游

從之暇嘗求予大書雙松之堂以壽其親親悅命來請  
記松之操稱於宣聖松之趣詠歌於古今賢士大夫固  
非庸草木可倫擬矣姬氏彭君敦謹謙信人也嗜朱子  
小學書居恒誦繹於斯堂之上焉回以從兄弟子來後  
愛教兼篤得代終之道者吾姨氏也恩禮媵侍復有小  
星之行焉不其賢乎哉以耽古訓之君子而配允賢焉  
無忝彼松矣是足書也彭君字九璋姨氏茶陵儒族王  
田推官玄孫云

西廨彭氏祀田記

彭君九璋修其世譜勒諸石而屋之為族譜之亭相厥成者賢配陳與脣子回也陳又以為亭成而無財則禮於何資乃贊夫子割田七畝供粢盛饗豆之費回以親命屬予記蓋欲登降是亭者世守勿壞且益敦于禮以隆孝敬焉嗚呼世以賄徼福異端愚夫愚婦一轍也孰有若彭君祀田之舉哉記以為勸不亦宜乎

孝思堂記



人之生樂莫樂於父母之具存番禺陳生獻章方娠而嚴親棄世則不幸之大者也賴三遷之教中戊辰乙榜進士篤漆雕之信復淹吾館每痛鯉庭之永隔感孟機之多違聞者動心焉家僮之返予為大書孝思題其白沙之堂而文以廣其意曰君子之於親跬步不忘于孝矧幽明之異侍養之曠哉然全其大必當畧其小慈顏無恙伯氏綜家正自求多福之時也及是時悉其心以立乎已俾人知陳氏之有子先君為不亡矣陳生勉乎

哉伯氏朝夕為我申其說於定省之餘亦足少慰倚門之況云

一樂堂記

予讀孟子書至三樂章未嘗不廢書以歎曰嗟乎一樂之事君子所深願欲而不可必得衆人得之而不知其樂者多矣世衰道微甚至於父子不用其情兄弟相為讐者一何心哉善夫張子敬夫之言曰三樂中不愧不怍其本必有不愧不怍之樂而後有以全其二焉審禹

何生潛其知言哉既以一樂名其戲綵之堂復承父兄  
命遠求不愧不怍之說於予予方愧怍之惟甚奚暇及  
於人邪無已則為申孟氏之旨與凡聖賢開示之方及  
踐履之實俾黃卷中自為師友以進也他日歸覲滿門  
和氣藹如春風一樂之勝天下孰加焉復為恕子之無  
似而細道聖賢之心蹟以為家慶壽未必不剗然撫掌  
於斯堂之上云

麗澤堂記

番禺謝生胖隨其舅氏何生潛鄉執陳生獻章來游吾館資二生以輔仁予嘉其氣相得而志相合也為講大易重兌之象而紬繹夫子體象之辭以掖其進焉兌之為卦陽實在下陰虛在上為澤之象重兌為二澤附麗之象二澤附麗互相滋益聖人謂天下互相滋益之大者惟朋友講習云然則講習云者辭章口耳乎管商老佛乎是蓋非徒無益而反害焉者豈聖人贊易之心哉乃若美在其中而暢於四支知周萬物而道濟天下斯

其所謂益者與三生中謝年最少子恐其受益二生多而先施或少焉故以麗澤大書於其筆硯之旁以勗之而特馳書其家山之堂以慰父兄之思云

天恩堂記

予嘗題上饒周村周文氏之世譜先籍荐罹兵燹無所於徵當宋時莫詳何代有堂名天恩御為記亦復不存景泰丙子仲冬予入閩迂道上饒訪文郡庠明日同造周村其族祖茂畿率諸子弟冒雨遠送森然舊家文采

可愛也擁爐夜話僉請大書天恩後以顏其新構之堂  
蓋不忘乎君親猶元公周子之名溪焉元公之家廬道  
雖脩阻而舊號乃著於所寓則故國池臺與夫松楸桑  
梓豈不髣髴乎朝夕而少慰戀本之誠哉周文氏距全  
盛時雖既寥闊猶幸傳聞故事得以名堂今日則夫先  
君典刑聲教庶幾如在慨慕之餘又以起孝子慈孫之  
仰於無窮因微以致著推舊而為新其聞元公之風而  
作邪抑秉彝人所共而惻怛慈愛之意異世而同符哉

是心也其天地生物之心乎驗諸日用之間凡非有所  
為油然以生者皆是心也充是心以弘厥德焉在周生  
固其所而族氏為咸宜惟繼序之益勤則流慶之益遠  
將見天恩之堂與周氏相為悠久豈直一時之光榮而  
已邪苟徒曰文具而已耳豈請者與記者之心哉

雲居山房記

左蜀安岳之南有山曰雲居山之麓孫處士良迪居之  
居富良疇而家素裕處士幼孤事母孝克勤先業屋益

潤馬讀書尚義濟貧者婚周窶者葬新大成之殿繕人  
里之橋能人所難亦處富之常道也彼嗜利之輩溺而  
不止者喪厥心焉耳處士之孫茂幼承祖訓賜戊辰進  
士今為春官郎中於吾妹壻為同寮且共西江之派以  
其故遇我特密春官子橘久予寓館共兒輩學資性可  
冀繩武處士之積益足徵焉嗚呼世率有虛譽誣其祖  
者與不明不仁均乎不孝然則雲居山房之書可傳信  
耳矣山水之佳勝予既未始游固不得而書山房之



細行亦在所畧云

浣齋記

南陽李先生退食之所名曰浣齋自為記以浣心之說  
為答客之辭而下問浣之之方於予予非借聽於聾乎無  
已願有復焉竊嘗以謂身垢易除心垢難浣夫心虛靈  
之府神明之舍妙古今而貫穹壤主宰一身而根柢萬  
事本自瑩徹昭融何垢之有然氣稟拘而耳目口鼻四  
肢百骸之欲為垢無窮不假浣之之功則神妙不測之

體幾何而不化於物哉予幼承父師之訓嘗讀先儒釋  
日新之旨每恨洗滌工夫未聞焉又讀夫子贊易洗心  
之章聖人妙用未易窺測也於是退而求諸日用之間  
從事乎主一無適及整齊嚴肅之規與夫利斧之喻而  
日孜孜焉廉隅辨而器宇寧然後知敬義夾持實洗心  
之要法等而上之聖人能事可馴而入顧庸資滅裂弱  
志逡巡卒歸於廢弛自棄前功良可惜哉先生則不然  
才識學行既超等夷而遭逢聖明相吾君以永清四海

者固平生抱負亦大丈夫分內事耳以予之箴為先生之禱且以就正云

尚友軒記

春官主客諸公名其退食之所曰尚友之軒屬予記之予假館是軒久資麗澤之益多可無言哉嘗聞覓名珠必巨海求良玉必名山君子欲成其德必先民是程也振衣千仞岡濯足萬里流卒之孤風遠操有以續前芳而激來世者非所志之大而能然邪是以人之生不患

氣質之不美而患立志之不高予也資既庸劣聞過甚  
晚年十八九時觀明道獵心而知迷途之當改讀孟氏  
卒章而知逸駕之難追每味聖賢言行於千百載之下  
而慨慕其精神風采於千百載之上恨不生於其時立  
於其門一蹴而造其域焉然志雖銳未悟其方功雖勤  
未領其要中遭疾疹而定力不固事與願違矣回視夙  
心恍然一夢或食而廢或寢而興長吁永嘆不如無生  
迨夫血氣益衰精神益減時一動懷未始不痛心而疾

首也此予平生尚友之志止於如是而已嗚呼人無再少時無再來五穀不熟不如稊稗凡我同志亦有感於斯與羣彥不予謬俾書軒之壁云軒之主人郎中孫茂員外郎秦顥倪讓主事孫曰讓張永也

### 桑溪記

桑溪周君子璵學邑庠時予嘗主於其齋又嘗一造桑溪而承親戚之歡蓋周乃黃倩而黃則吳出也後四十載恭攜兒子重上君子之堂拜先子手蹟有云恨未一

會又云惟力學以膺遠大末云甥女孺人粧次仁人君子於親親之誼固如是矣於時冬景融和盎然春候周君夫婦年皆七十而康寧子孫滿前細論疇昔琴一曲酒數行暢詠而別他日黃氏子良致二老慇懃謂不鄙桑溪而辱游焉願為記之嗟乎雪山增重草木可敬豈欺我哉顧予何人而足語此表桑溪者不在於周乎記以俟之

節壽堂記

界分截然之謂節文從竹可徵也人倫物理莫不有自然之節順之為貴凌則瀆矣世有節士節婦之稱非以其克順乎固有之天邪吾宗有字子堅者讀書俊拔人也配周氏同邑某人女年三十有三而嫠抱遺孤昂秉節不違天順甲申年九十而康寧昂請大書為壽予以節壽名其奉養之堂鄉鄰觀者咸加歎賞為吳氏慶明年復屬族弟某請記洪範壽居五福之首是壽誠足貴也然躋其域者雖有康寧而壽者難節而壽者尤難記

以慰孝子慈孫之心不亦宜乎

墨池記

傅君秉彛臨川驛溪人也永樂中予訪君驛溪過於知  
我館穀歡甚間滌硯於池君躍然笑曰他日應謂吳先  
生嘗洗墨於斯也由是盛知驛溪之有墨池焉君逝矣  
嗣子襄欲立石池上求文鏤記之古之君子使高山仰  
止之心不能自己於數千百世之下者豈偶然之故哉  
或性命道德之純或文章政事之懿或節義之踔絕或



遺愛之滂洋或功高宇宙而不居或名揚竹帛而不有  
殘膏賸馥之沾溉流風餘韻之漸被宜乎入人之深而  
動人之切是以懷其人必有以重其蹟覽其蹟必有以  
得其心而歆嗟慨慕之無涯矣甘棠勿剪拜草木皆可  
敬豈欺我哉予也立志弗堅為學無勇徒竊虛名以誑  
於世傳君不以靡薄玷斯也而反取其蹟豈溺愛者不  
明乎然強顏受簡而不辭者所以表孝思之無窮而著  
金蘭之高致抑使覽者知予之不佞直以過情之聞誤

友朋之辱庶幾反躬無蹈覆車之轍云

恥齋記

予嘗慨古今人品之不同每若薰蕕之異氣冰炭之殊性陰陽晝夜之相反豈其才之故哉抑氣習然耶抑由其心之有通塞故臧否以之而判耶一有賢知非其生質之良必其務學之懿如江右僉憲呂侯是也侯之言曰歷官二十餘載事事不逮於人取孟氏之旨以恥名夫退食之齋日以自勵而下詢於芻蕘夫恥者吾所固

有羞惡之心惟其梏之反覆而失是心也漫不覺知訑  
訑自廣人莫已若人欲肆而天理微矣惟侯之心其不  
自滿假檢身若不及之誠乎上而追友千古進善其有  
窮哉心一也勝於物則靈掩於物則昏人一也有恥則  
可教無恥大不幸企仰高風恍然自失恨不痛策驚足  
逕攀逸駕顧茲歲晚徒傷噬臍古不云乎失之東隅收  
之桑榆尚冀抖擻餘魂迅改迷途以從事恥齋之後塵  
云

蘭軒記

羣草木非無香而蘭之香獨妙天下者非以其細而婉乎是曰幽香不類君子玄德哉稱尚古今宜矣永嘉呂公本讓種蘭以勗諸子善於為喻也夫子謂誰今巡按江西監察御史君洪也僕竊伏山林側聆餘韻喜而不寐近臨敝邦遣使辱書益歆風采可謂能子矣且以居竹涵養大楷相命尤見用心之遠居竹先子故號涵養今日良規念嚴訓之在目宜體蘭之加勉蘭之為卉稟

二氣之清根既殊科香固絕倫吾人於學可不務厥本  
哉涵養者立本之方也日新又新則積中者日盛發外  
者日著豈直播譽一時會應流芳百世增蘭故事為他  
日美談大丈夫當如是矣僕也舊學愈荒晚節彌怠悚  
望騫騰撫卷悵然

坦齋記

代淮  
府作

水本平浪鼓於風道本平設生於欲風恬浪靜而水得  
安流欲消設去道得平鋪一補過之或吝則危機之是

履矣善夫康節堯夫之言曰面前自有好田地天下豈  
無平路歧是以聖人之心如止水無適而非坦道焉君  
子之學舍聖何歸欲師於聖其廓然而大公物來而順  
應乎居敬窮理明諸體養氣集義利諸用而曰聖不可  
學吾不信也慈谿馮某伴讀於予有志焉故以坦名齋  
致仕而歸也告予言以為桑榆之警且以為記云

省庵記

無極之妙充盈宇宙而該貫吾心何可湏臾離哉然事

幾萬態大和難保不有精鑒以為權度難乎免於流俗  
架空之患矣甚則差之毫釐謬將千里安求其人心不  
死而天理常存也耶商書之省躬魯論之三省良有以  
哉竊謂動容周旋無不中理者聖隨事致省不敢違理  
者賢瞢不知省日趨小人之域如走者聖賢之罪人也  
不曰賢希聖士希賢乎大哉金侯希賢之志哉宜乎其  
民之多譽也俯省微軀資既庸志彌憤駸駸衰暮枉此  
生於醉夢企仰華菴徒增浩歎何顏受簡侯名銑字宇

潤淮陰人今守上饒云

思善堂記

父子之道天性也其有不愛乎反是者喪其天耳是以孝子之於親視於無形聽於無聲況其顯者哉

原闕

其

逝也嗣子永既屬題其墓文之益蕪請贊其所寫之真皆未暇也復馳書千里俾記夫思善之堂仁哉其用心歟昔程叔子之於伯子也干誌於持國干書於叔曼讀孫韓二簡令人三歎而不已張氏子汲汲乎惟親善之




不傳是懼豈異世而同符抑東葵人所共耶嗚呼流俗  
滔滔知德者鮮非徒忘先且辱親焉立身行道揚名後  
世幾何人哉張君早以高科著聲卽署其為郡也澤加  
於民令聞旁達可謂媲美前休矣然太山高矣太山頂  
上不屬太山則君子之志固不可滿而事業豈有窮哉  
夫惟知周萬物然後道濟天下故君子貴乎仕而優則  
學公退必讀書也明公持英妙之姿當強仕之秋萬里  
鵬程高舉在我黃卷新功數飛示焉

蘭軒記

蘭之產恒在幽遠而花葉淨素類君子闇然自修天香  
暗襲清人肺腑類君子德之及人心醉而誠服是以古  
今尚焉淮王殿下軒以蘭名厥旨微哉教帖遠臨高辭  
典雅傑筆清嚴使者之誦曰乾乾朝夕羣經是耽其德  
與日俱新學與年俱積可不叩而知得於蘭也不亦深  
乎周惇頤曰道充為貴身安為富賢王之謂矣蘭哉蘭  
哉二而一者也

中和齋記

天順甲申四月庚戌淮王殿下遣使沐書幣命大書蘭  
軒梅月雪窠中和諸扁蘭軒既僭記之矣十有一月庚  
申復辱書幣不罪其粗鄙猶俾記夫中和之齋夫梅月  
之清味雪窠之雅操與夫蘭軒之德馨心融神會而收  
功於中和之極致穹壤之間何樂如之鋪張盛美宜有  
其人烏覓之言何足形容萬一哉無任感恩激切屏營  
俟罪之至



康齋集卷十